

Milton Ponson, presidente Fundacion Rainbow Warriors Core (Rainbow Warriors International)

Dia di Himno y Bandera nos mester refleha riba e pregunta si nos ta dignamente doño di nos mes cas

ORANJESTAD - Diahuebs ultimo sr. Milton Ponson, presidente Fundacion Rainbow Warriors Core (Rainbow Warriors International) a manda e comunicado di prensa aki caminda e ambientalista y luchado di e dererechonan humano ta señala cu siasabra 18 maart Aruba ta celebra en grande su Dia di Himno y Bandera, esta su dia nacional.

Sr. Ponson ta bisa cu e aña aki e celebracion ta di un importancia adicional ya cu ta alavez celebra na 2006, 20 aña di status aparte di Aruba.

E Dia di Himno y Bandera a ser institui riba 16 maart 1976 pa Consejo Insular di Aruba, pa celebra e ocasion historico cu riba 18 maart 1948 pa prome biaha den un conferencia di mesa rondo di Reino Hulandes a manifesta e anhelo y deseo fervente di e pueblo di Aruba pa ta forma un pais goberna autonomamente den e constelacion di e Reino Holandes.

E deseo aki a ser realisa te na 1986 ora despues cu den un forma diplomatica nunca mas iguala pa ningun politico na Aruba e politico Gilberto Francois (Betico) Croes den e negociacionan di Conferencia di Mesa Rondo di 1983 a logra

guia e discusion riba e futuro constelacion di Reino pa e opcion unda entrante 1 januari 1986 Aruba lo a obtene su Status Aparte, cu mencion mediante un articulo den Statuut pa e opcion pa opta pa independencia.

E articulo den statuut mencionando independencia pa Aruba a ser elimina na 1996 y awendia Aruba ta goza di un Status Aparte, desea y aspira pa Curacao y St. Maarten tambe.

E himno y bandera Arubiano ta banda di nos idioma Papiamentu dos simbolo di unidad nacional y cu tur razon e pueblo di Aruba lo celebra 18 maart benidero cu tanto entusiasmo.

E pregunta ta surgi no obstante si e bandera ta para ainda pa loka e originalmente tawata para, esta nos mester puntra nos mes si e nificacion politico y gubernamental di e fecha 18 maart ainda ta mes relevante den e sentido y contexto di un autonomia completo cu un gobernacion digno, cual deseo a ser manifesta na 18 maart 1948.

E contesta riba e pregunta aki mester ta un firme NO, ya cu e ultimo 20 aña den un forma alternando tanto gobernacionan di signatura di MEP como AVP a coba e fundeshi di nos autonomia, dor di den un forma no

planifica, cu falta di gobernacion transparente, patronahe politico na abundancia y polarizacion di nos comunidad a desaroya economicamente nos isla na un manera acelera y no controla.

Den un forma completamente no duradero a construi hotel na gran escala, roza naturaleza na un forma barbaro pa yena e vacio cu asfalt y concret, y dor di importa 45.000 trahador stranhero.

Awendia no por papia mas di un desaroyo economico sostenibel y e problemanan social, financiero y di husticia tanto den seno di aparato gubernamental como comunidad ta aumentando drasticamente.

E abundancia di rikeza acopla na e crecimiento rapido economico na Aruba no a ser reparti igual y hustamente, y e pobreza ta crece cada dia mes, y hunto cu esaki e inquietud social y malcontento den pueblo.

Aruba riba papel ta un isla rico, pero pa causa di un secuencia di tanto gobernacion di AVP y MEP, e sector publico a converti su mes den un monstruo cu ta guli placa mas rapido cu gulidor ta manda awa, y cual ta chupa e energia vital for di sector priva y e comunidad dor di den un forma cada bez mas rapido y inhusto pone man riba e recursonan



financiero di compania y ciudadano na Aruba.

Tin tur razon pa ta orguyoso riba e hecho cu tin un sentimiento nacional den e pueblo di Aruba, y cu esaki lo manifesta su mes grandemente den e celebracion di 18 maart benidero.

Pero e sentimiento aki lo tawatin un dimension hopi mas amplio cu un nificacion mas profundo si alavez e pueblo di Aruba por a celebra di por ta un pais autonomo cu un gobernacion digno, cu representantenan y gobernante digno na e timon di nos pais.

Esaki seguramente no ta a caso y e ultimo 20 aña tanto gobiernonan di MEP y AVP a entrega tantisimo libertad y competencia como pais autonomo na e politiconan na Den Haag.

Un pregunta hopi significativo, esta si nos ta donjo berdadero di nos mes cas cu nos status aparte, ya cu mas y mas asunto ta ser dirigi directamente for di Den Haag, pa cuminsa cu Justicia.

Binti aña di bon intencion no a trece nos mas cerca na Aruba di e ideal, esta un pais autonomo den e constelacion di Reino, cu un gobernacion digno, y un desaroyo socieconomico den cual tur ciudadano igualmente ta piki e frutanan di progreso.

Un autonomia y gobernacion digno y progreso y bienestar igual pa tur, e deseo di Betico Croes, cu ainda falta pa realisa. Te akinan e comunicado di prensa di sr.

Milton Ponson, presidente Fundacion Rainbow Warriors Core (Rainbow Warriors International).